

Buku Jayakumar papar proses 3 pindaan Perlembagaan S'pura

Buku tulisan mantan Timbalan Perdana Menteri beri gambaran
selok-belok kerja Kabinet, proses gubal undang-undang



Mantan Timbalan Perdana Menteri, Profesor S. Jayakumar (kiri) semasa pelancaran bukunya, 'Creating Three Unique Singapore Laws: An Inside Story' di bangunan Kementerian Ehwal Luar, yang dihadiri oleh Menteri Kanan, Encik Lee Hsien Loong. – Foto ST

SHIQIN RAMADAN
shiqinr@sph.com.sg

Mantan Timbalan Perdana Menteri, Profesor S. Jayakumar, berharap dapat memberi gambaran kepada orang ramai tentang selok-belok kerja Kabinet serta proses membuat keputusan berhubung tiga undang-undang – skim Anggota Parlimen Tanpa Kawasan Undi (NCMP), Kawasan Undi Perwakilan Berkumpulan (GRC), dan Presiden Dipilih (EP) – menerusi bukunya yang bertajuk *Creating Three Unique Singapore Laws: An Inside Story*.

Dilancarkan pada 12 Ogos di bangunan Kementerian Ehwal Luar (MFA), buku hasil tulisan Profesor Jayakumar itu, yang setebal 243 halaman, mengupas proses pindaan Perlembagaan Singapura bagi menubuhkan tiga institusi tersebut.

Turut hadir semasa majlis pelancaran buku itu ialah Menteri Kanan, Encik Lee Hsien Loong; Mantan Presiden, Dr Tony Tan; dan Menteri Kanan Emeritus, Encik Goh Chok Tong.

Memberi perincian lebih lanjut, Profesor Jayakumar, 87 tahun, berkata:

“Saya fikir penting bagi kita untuk meneliti amalan terbaik negara lain, menyesuaikan amalan yang berguna kepada kita atau menyesuaikannya mengikut keadaan kita.

“Namun, kita juga perlu sedar dengan jelas bahawa pendekatan yang digunakan oleh negara lain tidak semestinya sesuai atau berkesan di Singapura kerana keadaan kita berbeza.

“(Buku saya) merupakan satu ilustrasi, secara kecil, tentang bagaimana kita perlu mencari jalan penyelesaian bagi situasi yang luar biasa, berfikir di luar kotak, serta menghasilkan penyelesaiannya.”

Profesor Jayakumar, yang menyertai bidang politik pada 1980, terlibat dalam proses menggubal ketiga-tiga undang-undang tersebut, daripada peringkat pencetusan idea sehingga diluluskan menjadi undang-undang.

Ketika berucap di majlis pelancaran itu, Encik Lee berkata:

“Buku tersebut merupakan sumbangan penting kepada sejarah perundangan dan perlembagaan Singapura.”

Dalam pada itu, Encik Lee telah mengupas tiga undang-undang itu dengan lebih lanjut.

Pertama, berhubung undang-undang bagi EP yang berkuatkuasa pada 1991.

Di bawah gagasan asal mantan Perdana Menteri Singapura, mendiang Encik Lee Kuan Yew berkenaan jawatan EP, Presiden disifatkan sebagai seorang “penjaga wicket” yang mempunyai kuasa amat luas, termasuk membubar-

kan Parlimen, mengadakan referendum nasional, dan mengisytiharkan keadaan darurat.

Undang-undang yang akhirnya diluluskan adalah sangat berbeza daripada cadangan asal mendiang Encik Lee dan terhasil selepas perdebatan yang sengit, di mana ramai menteri muda ketika itu menentang cadangan asal tersebut, seperti yang dikongsi Profesor Jayakumar dalam bukunya.

Di bawah skim GRC yang dimulakan pada 1988, sekurang-kurangnya seorang calon mesti terdiri daripada kaum minoriti, yang ditakrifkan sama ada sebagai komuniti Melayu atau India dan minoriti lain seperti Serani.

Namun, Profesor Jayakumar mendedahkan dalam bukunya bahawa anggota Kabinet telah mempertimbangkan beberapa mekanisme bagi menangani isu perwakilan masyarakat Melayu apabila ia kali pertama diketengahkan mendiang Encik Lee.

Tumpuan telah beralih daripada hanya memastikan perwakilan masyarakat Melayu kepada usaha memastikan perwakilan daripada masyarakat India dan masyarakat minoriti lain turut terjamin.

Encik Lee berkata “skim tersebut telah memberi sumbangan besar dalam melindungi dan memupuk politik berbilang kaum di Singapura”.